

# KEMPEN eDUIT HOTSPOT DI DAERAH KINTA

## KERAJAAN NEGERI MELAKSANAKAN INISIATIF e-PEMBAYARAN DI PERAK BAGI MEMBANTU KOMUNITI PENIAGA DAN MASYARAKAT SETEMPAT MENINGKATKAN PROSES PENDIGITALAN

**IPOH, OGOS 19, 2023** – Kempen eDuit Hotspot telah bermula di Daerah Kinta dengan satu program 'Walk-About' Pengerusi Jawatankuasa Pembangunan Wanita, Keluarga, Kebajikan Masyarakat dan Pembangunan Usahawan, YB Puan Salbiah binti Mohamed di Pasar Tani, Stadium Indera Mulia, pagi ini.

Kerajaan Negeri melalui Digital Perak Corporation Holdings (Digital Perak) dan Sekretariat Usahawan Negeri Perak (STeP) telah bekerjasama dengan Bank Negara Malaysia (BNM) untuk menyasarkan 3,000 peniaga kecil dan mikro di gerai dan medan selera, para pekedai di Ipoh Old Town serta usahawan-usahawan di bawah TEKUN Nasional, Amanah Ikhtiar Malaysia (AIM), Majlis Amanah Rakyat (MARA) dan Lembaga Pemasaran Pertanian Persekutuan (FAMA) Negeri Perak.

Daripada jumlah ini, 60% disasarkan akan menerima e-pembayaran menjelang September 2023 dan 300,000 transaksi e-pembayaran menjelang hujung 2023.

Inisiatif e-pembayaran ini turut melibatkan Pihak Berkuasa Tempatan (PBT) dan sembilan institusi-institusi kewangan tempatan.

Selain di Daerah Kinta, projek perintis kempen ini juga difokuskan di Daerah Manjung.

Melalui sistem e-pembayaran, para peniaga dan pengguna akan menikmati pelbagai manfaat dari segi kos, kecekapan dan keselamatan dengan membantu meningkatkan peluang perniagaan, pengurusan rekod perniagaan yang lebih teratur serta melindungi kedua-dua pihak daripada risiko kecurian dan penerimaan wang palsu.

Di samping memberikan hebahan dan promosi Kempen eDuit Hotspot, program 'Walk-About' ini juga bertujuan untuk beramah mesra dan memberi keyakinan kepada para peniaga bagi menggalakkan proses migrasi kepada pembayaran tanpa tunai.

Kempen enam bulan yang bermula Jun 2023, dijangka akan dilancarkan pada September 2023.

Hadir bersama-sama dalam program 'Walk-About' ini, Ketua Pegawai Eksekutif Digital Perak, Mohamad Suhaimi Mohamad Tahir, Pengarah STeP, Mohamad Rozlan bin Mohamad Razali dan ketua-ketua jabatan dan agensi kerajaan negeri.

